



BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINA OLOVO
Općinski načelnik

Broj: 02-20-1-294-5/25
Olovo, 29.05.2025. godine

Na osnovu člana 4. Sporazuma (broj: 02- 20-1-294-4/25 od 14. 05.2025. godine) o sufinansiranju projekta "Smanjenje siromaštva kroz donaciju steonih junica za 16 porodica nastanjenih na području općine Olovo" i člana 42. stav 1. alineja 8. Statuta Općine Olovo ("Službeni glasnik Općine Olovo", broj: 2/07, 4/08, 7/18 i 8/19) Općinski načelnik Općine Olovo **d o n o s i**

PRAVILNIK O UTVRĐIVANJU USLOVA, KRITERIJA I POSTUPAKA ZA OSTVARIVANJE PRAVA ZA SUBVENCIONIRANJE I DODJELU STEONIH JUNICA

I OSNOVNE ODREDBE

Član 1.

Ovim Pravilnikom utvrđuju se uslovi, kriteriji i postupak za ostvarivanje prava za dodjelu steonih junica koji sufinansiraju: Općina Olovo, Nevladina organizacija Muslim Aid Association Sarajevo i krajnji korisnici – odabrana porodica (u daljem tekstu: Projekat).

Član 2.

Pravo na učešće u Projektu imaju fizičke osobe koje imaju prebivalište na području općine Olovo, a posebno prioritete kategorije stanovništva su: nezaposlene osobe, osobe sa više članova porodice i mlade osobe, koje imaju vlastito poljoprivredno zemljište u površini od 5 dunuma ili imaju pravo na korištenje tuđeg zemljišta (ugovor o korištenju) i adekvatan štalski objekat. Osobe koje su bile korisnici Projekta „Ekonomsko osnaživanje nezaposlenih i socijalno ugroženih porodica kroz stočarstvo“ 2014. i 2015. godine ili njihov bračni drug neće imati pravo učešća u ovom projektu.

II PRAVO UČEŠĆA I USLOVI ZA DODJELU STEONIH JUNICA

Član 3.

Podnosioc zahtjeva treba da ispunjava sljedeće opće i posebne uslove:

1. OPĆI USLOVI:

- da je podnosilac prijave ili član njegove uže porodice vlasnik ili posjednik poljoprivrednog zemljišta u površini od 5 dunuma ili mu je zemljište dodijeljeno ugovorom o korištenju,
- da je podnosilac prijave vlasnik štalskog objekta adekvatnog za smještaj grla,
- da će Projekat sufinansirati u procentu od 15% od nabavne cijene steone junice (=900,00 KM).
- da posjeduje u vlasništvu najviše dvije krave ili junice

2. POSEBNI USLOVI:

1. broj članova zajedničkog domaćinstva,
2. broj nezaposlenih punoljetnih članova zajedničkog domaćinstva,
3. broj izdržavanih članova zajedničkog domaćinstva,
4. evidencija na Birou za zapošljavanje podnosioca prijave.

5. samohrani roditelji, mladi bračni parovi do 40 godina, osobe sa invaliditetom,
6. štalski objekat (zoohigijenski i zootehnički uslovi u štali),
7. socijalni aspekt (stanje na terenu, imovno stanje, opći dojam i sl.)

III KRITERIJI ZA BODOVANJE PODNOSIOCA ZAHTJEVA ZA DODJELU STEONIH JUNICA

Član 4.

Kriteriji za bodovanje podnosioca zahtjeva:

1. Broj članova zajedničkog domaćinstva

Broj članova zajedničkog domaćinstva	Broj bodova
1- 3 člana	=1 bod
preko 3 člana	=2 boda

2. Podnosilac zahtjeva nezaposlen

=4 boda

3. Za svakog izdržavanog člana zajedničkog domaćinstva (nezaposlene osobe koje se ne nalaze na evidenciji nezaposlenih osoba Biroa za zapošljavanje, djeca, učenici, starije osobe bez evidencije na Birou i sl.)

=1 bod,

4. Za svakog punoljetnog nezaposlenog člana zajedničkog domaćinstva koji se nalazi na evidenciji nezaposlenih osoba Biroa za zapošljavanje

=1 bod

5. Podnosilac zahtjeva samohrani roditelj

= 3 boda

6. Podnosilac zahtjeva osoba životne starosti do 40 godina

= 4 boda

7. Podnosilac zahtjeva ili član uže porodice osoba sa invaliditetom

= 3 boda

8. Brojnost stoke:

Broj članova zajedničkog domaćinstva	Broj bodova
0 grla stoke	=3 boda
1 grlo stoke (krava,)	=2 boda
2 grla stoke (krave)	=1 bod

9. Pogodnost smještajnog kapaciteta štalskog objekta (0-5)

Prostor po grlu	Broj bodova
$\geq 8 \text{ m}^2$	2 bod
$6-7 \text{ m}^2$	1 bod
$< 6 \text{ m}^2$	0 bodova

Osvjetljenje	Broj bodova
Vrlo dobro (veliki prozori preko 30% tlocrta objekta)	2 boda
Djelimično (ne manje od 10% tlocrta objekta)	1 bod
Slabo (manje od 10% tlocrta objekta)	0 bodova

Pristup vodi	Broj bodova
Automatizovan, automatska pojllica	2 bod
ručni ali redovan	1 bod
ograničen pristup	0 bodova
Opće stanje objekta	Broj bodova

Nov ili renoviran građen od cigle (star do 15 godina)	2 boda
Prosječno stanje (starost do 30 godina)	1 bod
Vrlo star (starost preko 30 godina)	0 bodova

10. Socijalni aspekt

Socijalni aspekt	Broj bodova
Nema primanja	7 bodova
Primanja po članu domaćinstva do 100,00 KM	5 bodova
Primanja po članu domaćinstva od 100,01 - 200,00 KM	4 boda
Primanja po članu domaćinstva od 200,01 - 300,00 KM	3 boda
Primanja po članu domaćinstva od 300,01 - 400,00 KM	2 boda
Primanja po članu domaćinstva veća od 400,00 KM	0 bodova

11. Stanje na terenu i opći dojam (utvrđuje komisija na terenu) = 0 - 10 bodova

Ukoliko komisija na terenu ustanovi da aplikant ne posjeduje štalski objekat ili da je štalski objekat neuslovan za držanje stoke (mali prostor za držanje stoke, nedostaje izvor vode, korisnik ne posjeduje prostor za držanje hrane, _____), aplikant će biti diskvalifikovan iz dalje procedure odabira.

Kada kandidati pri bodovanju imaju isti broj bodova, prednost će imati kandidati koji imaju mlade osobe, nezaposleni aplikant, višečlane porodice i samohrani roditelji.

IV POTREBNA DOKUMENTACIJA

Član 5.

Podnosioci zahtjeva trebaju priložiti sljedeću dokumentaciju:

1. Obrazac za prijavu na Javni poziv.
2. Dokaz o mjestu prebivališta (CIPS) ili ovjerena kopija lične karte.
3. Ovjerena kućna lista.
4. Dokaz o nezaposlenosti svih punoljetnih članova zajedničkog domaćinstva izdat od Biroa za zapošljavanje (osobe koje nisu prijavljivane na Birou za zapošljavanje (starije osobe) ovjerena izjava o tome ili potvrda da osoba nije poreski obveznik izdat od Porezne uprave Olovo).
5. Potvrde iz škole/fakulteta za djecu/izdržavane članove domaćinstva ili kopiju đачke knjižice ili svjedočanstva (za djecu predškolskog uzrasta priložiti kopiju rodnog lista).
6. Uvjerenje ili drugi dokaz o prosječnom prihodu za posljednja 3 mjeseca za svakog zaposlenog člana domaćinstva sa kućne liste (za penzionere posljednji ček od penzije ili potvrda izdata od banke).
7. Vlasništvo/posjed nad parcelom (kopija ZK izvatka ili Posjedovnog lista) ili ovjeren Ugovor o zakupu poljoprivrednog zemljišta sa kopijom ZK izvatka ili Posjedovnog lista, na minimalno 5 godina.
8. Ovjerena izjava da posjeduje štalski objekat u svom vlasništvu.
9. Ovjerena izjava da će korisnik podsticaja dobijeno grlo u vlastitom uzgoju zadržati najmanje 3 godine od dana potpisivanja Ugovora.
10. Ovjerena izjava da će sufinansirati 15% od nabavne cijene steone junice (=900,00 KM).
11. Ovjerena izjava da u vlasništvu ili u vlasništvu člana uže porodice posjeduje najviše 2 krave.
12. Dokaz da je mlada osoba životne starosti do 40 godina (dokazuje se ovjerenom kućnom listom).
13. Dokaz da je samohrani roditelj (Uvjerenje Centra za socijalni rad, smrtni list).
14. Dokaz da je podnosilac prijave ili član uže porodice (dijete ili bračni drug) osoba sa invaliditetom (potvrda ili drugi dokument kojim aplikant dokazuje da je osoba sa invaliditetom).

Obrazac za prijavu na Javni poziv (aplikacijski formular) kao i izjave pod rednim brojevima 8.,9.,10. i 11. podnose se na propisanom obrascu izjave.

Ukoliko se prilikom bodovanja kandidata utvrdi nedostatak dokumentacije iz gore navedenih stavki, takva prija neće se uzeti u razmatranje.

Komisija zadržava pravo provjere dokumentacije ukoliko sumnja u vjerodostojnost dostavljenih dokumenata.

V IZBOR KANDIDATA

Član 6.

Općina Olovo će objaviti Javni poziv za podnošenje zahtjeva za dodjelu steonih junica u skladu sa ovim Pravilnikom.

Izbor kandidata za dodjelu steonih junica vrši se na osnovu pristiglih prijava na Javni poziv.

Član 7.

Općinski načelnik imenuje Komisiju za odabir krajnjih korisnika za dodjelu steonih junica.

Zadatak Komisije je: pregled prispjelih prijava, evidentiranje kandidata koji ispunjavaju uslove iz Javnog poziva, obavljanje uviđaja na licu mjesta, obavljanje svih potrebnih radnji u cilju sačinjavanja zapisnika o provedenim aktivnostima, sačinjavanje liste krajnjih korisnika na osnovu utvrđenih kriterija za bodovanje, te dostava iste Općinskom načelniku zajedno sa zapisnikom.

Saglasnost na predloženu rang listu kandidata daje Općinski načelnik. Rang lista odabranih kandidata se objavljuje na oglasnoj ploči Općine Olovo i službenoj web stranici Općine Olovo.

Član 8.

Izabrani kandidati potpisuju Ugovor o dodjeli steonih junica, kojim će biti regulisana sva prava i obaveze ugovarača.

Član 9.

Projekat je odobren od strane Općinskog načelnika kao socijalni program, odnosno program kapitalnih ulaganja u poljoprivredu.

Član 10.

Pravilnik stupa na snagu danom donošenja.

Dostavljeno:

- ① Komisija za provođenje javnog poziva
2. Služba za ekonomske poslove 2X
3. Oglasna ploča
4. U evidenciju
5. a/a
- 6.

